



PRAKATA



**MENTERI KEWANGAN
MALAYSIA**

Pandemik COVID-19 telah mencetuskan krisis kesihatan di seluruh dunia yang merencatkan pertumbuhan global dan seterusnya menjejaskan perniagaan dan kegiatan ekonomi domestik pada 2020. Dalam memelihara dan melindungi nyawa yang tidak ternilai, Kerajaan telah mengambil langkah ketat untuk mencegah wabak dengan melaksanakan pelbagai peringkat kawalan pergerakan. Walaupun langkah ini telah berjaya mengawal penularan COVID-19, pelaksanaan sekatan ke atas aktiviti harian rakyat telah menjejaskan aliran barangan dan perkhidmatan serta memberi impak kepada rantai bekalan ekonomi domestik. Akibatnya, operasi perniagaan merudum dan aliran tunai turut terjejas sehingga memberi kesan kepada ekonomi secara keseluruhannya. Permintaan ekonomi dijangka merosot berikutan jangkaan pemberhentian pekerja dan peningkatan pengangguran yang seterusnya menjejaskan pendapatan isi rumah.

Kerajaan secara proaktif telah bertindak pantas dengan melaksanakan beberapa pakej rangsangan dan pelan pemulihan ekonomi yang secara kolektif membentuk rangsangan ekonomi terbesar dalam sejarah Malaysia. Empat pakej iaitu – PRIHATIN (RM250 bilion), PRIHATIN PKS+ (RM10 bilion), PENJANA (RM35 bilion) dan KITA PRIHATIN (RM10 bilion) – secara keseluruhannya bernilai RM305 bilion merangkumi langkah fiskal dan bukan fiskal dengan suntikan fiskal langsung sebanyak RM55 bilion. Intervensi dasar fiskal dan monetari yang dilaksanakan bertujuan melindungi nyawa dan kehidupan rakyat, membantu aliran tunai perniagaan serta menyokong dan menjana semula ekonomi.

Parlimen telah meluluskan Akta baharu bagi mewujudkan Kumpulan Wang COVID-19 iaitu kumpulan wang amanah khusus untuk melaksanakan semua langkah fiskal di bawah pakej rangsangan dan pelan pemulihan ekonomi. Akta ini juga berperanan untuk memastikan disiplin fiskal, akauntabiliti dan ketelusan dalam pelaksanaan langkah pakej rangsangan. Sehubungan itu, Kerajaan telah menyemak semula sasaran defisit 2020 daripada 3.2% kepada 6% daripada KDNK. Penting dinyatakan bahawa kesemua langkah ini dibiayai melalui pinjaman dalam negeri dan had statutori hutang baharu telah ditingkatkan secara sementara kepada 60% daripada KDNK berbanding had semasa 55%. Akta ini hanya berkuat kuasa sehingga akhir 2022 apabila tahap hutang dijangka berkurang ke tahap sebelum krisis, iaitu setelah ekonomi pulih dan kembali ke arah landasan pertumbuhan.

Dengan objektif untuk memulihkan dan menjana semula ekonomi, Kerajaan akan terus melindungi rakyat dan kehidupan mereka serta menyokong fasa Memperkasa Ekonomi (*Revitalisation*) dalam Belanjawan 2021. Belanjawan ini telah distruktur berlandaskan empat tema – menjaga kebajikan rakyat, memacu pertumbuhan ekonomi, melestarikan kehidupan dan memantapkan penyampaian perkhidmatan awam. Saya yakin bahawa Belanjawan ini akan menyokong momentum pemulihan ekonomi dan menjamin kesejahteraan rakyat di samping meningkatkan lagi kecekapan dan keberkesanan perbelanjaan awam.

Memandangkan kesan pandemik ini dijangka berlanjutan sehingga 2021, defisit fiskal disasarkan untuk berkurang kepada 5.4% daripada KDNK. Kerajaan akan meneruskan konsolidasi fiskal setelah ekonomi pulih daripada krisis COVID-19. Melalui agenda reformasi fiskal, Kerajaan mensasarkan defisit fiskal berkurang di bawah 4% daripada KDNK dalam tempoh tiga hingga empat tahun akan datang. Sasaran ini akan dicapai melalui langkah seperti penambahbaikan dalam sistem kutipan hasil semasa serta meluaskan asas hasil Kerajaan. Dalam masa yang sama, Kerajaan telah mencapai kemajuan dalam usaha rasionalisasi untuk meningkatkan kecekapan operasi dan menambah baik pengurusan kos. Akta Tanggungjawab Fiskal sedang digubal untuk meningkatkan disiplin dan tadbir urus pengurusan fiskal dalam memastikan kewangan awam yang mantap dan mampan.

Penerbitan Tinjauan Fiskal dan Anggaran Hasil Kerajaan Persekutuan bertujuan meningkatkan ketelusan dalam menyampaikan maklumat dasar fiskal Kerajaan kepada rakyat. Penerbitan ini berserta laporan lain yang dikeluarkan oleh Kementerian Kewangan akan memberi pemahaman yang menyeluruh mengenai operasi fiskal dan kewangan awam meliputi semua peringkat Kerajaan dan syarikat awam.

Kekuatan asas dan daya tahan ekonomi kita telah diuji pada 2020. Walau bagaimanapun, tempoh yang amat getir ini memberi peluang berharga untuk melaksanakan *rebalancing act*, melakukan yang terbaik dengan sumber sedia ada, dan juga memastikan pertumbuhan mampan pada masa hadapan. Insya-Allah, dalam mengatasi cabaran ini, akan ada banyak lagi peluang untuk Kerajaan membina semula dan memperkukuh asas fiskal dan kewangan negara kita pada tahun mendatang.



SENATOR TENGGU DATO' SRI ZAFRUL TENGGU ABDUL AZIZ
6 November 2020